

## 變調的節奏

### 1 自律神經失調

我的頭殼是敏感無穩定的斷層帶  
每一擺交感神經佻副交感神經的板塊相擠  
就會引起規模強烈的地動  
震央佇腦海深處災區遍及全身各地

一間一間倒落的希望  
埋葬著一個一個袂赴逃出破碎的眼夢  
脆弱的心情潰散成絕望的土石流  
烏暗包圍所有生命的出口  
毋知何時才見會著天光  
崩岸的目屎是失去控制的亂流  
思路斷裂做一截一截的危橋  
完全失去對外的溝通

頭疼心悸失眠驚惶反腹流清汗全身無力  
四界紛紛發出求救的信號  
我是受傷沉重的孤島  
束手無助苦苦等待  
救援爲啥物猶 遲遲無來

- 註：1 頭殼 thau<sup>5</sup>khak<sup>4</sup>：腦袋  
2 每一擺 mui<sup>2</sup>tsit<sup>8</sup>pai<sup>2</sup>：每一之  
3 佻 kah<sup>4</sup>：和、與  
4 地動 te<sup>7</sup>tang<sup>7</sup>：地震  
5 袂赴 be<sup>7</sup>hu<sup>3</sup>：來不及  
6 烏暗 oo<sup>1</sup>am<sup>3</sup>：黑暗  
7 毋知 m<sup>7</sup>tsai<sup>1</sup>：不知  
8 天光 thinn<sup>1</sup>kng<sup>1</sup>：天亮  
9 崩岸 pang<sup>1</sup>huann<sup>1</sup>：潰堤  
10 目屎 bak<sup>8</sup>sai<sup>2</sup>：眼淚  
11 反腹 ping<sup>2</sup>pak<sup>4</sup>：反胃  
12 清汗 tshing<sup>3</sup>kuann<sup>7</sup>：冷汗  
13 四界 si<sup>3</sup>ke<sup>3</sup>：四處  
14 爲啥物 ui<sup>7</sup>siann<sup>2</sup>mi<sup>2</sup>：爲什麼

## 2 腰椎間盤突出

親像磨仔心全款  
面對雙方的夾攻你的負擔傷過沉重矣  
一頭愛承受頂懸龐大的壓力  
扛起愈來愈虛弱強欲崩落的身軀  
一頭愛應付下面無停的要求  
支撐愈來愈無力隨時會跋倒的跋步

自身已經難保  
哪閣會堪著外來粗魯的侵犯  
就算個性閣再圓滑柔軟  
嘛忍袂牢這種長期的壓迫  
受傷的神經發出陣陣的抗議  
酸 是無人知也的苦衷  
疼 是無法避免的代價  
麻 是無力改變的命運  
動刀流血恐驚是無可奈何的選擇

我每工坐立不安寸步難行  
只有倒落的時陣  
才會當得到短暫的解脫

- 註：1 親像 tshin<sup>1</sup>tshionn<sup>7</sup>：好像  
2 全款 kang<sup>5</sup>khuan<sup>2</sup>：一樣  
3 傷過 sionn<sup>1</sup>kue<sup>3</sup>：太過  
4 愛 ai<sup>3</sup>：要  
5 頂懸 ting<sup>2</sup>kuan<sup>5</sup>：上面  
6 強欲 kiong<sup>5</sup>beh<sup>4</sup>：快要  
7 跋倒 puah<sup>8</sup>to<sup>2</sup>：跌倒  
8 跋步 kha<sup>1</sup>poo<sup>7</sup>：腳步  
9 哪閣 na<sup>2</sup>ko<sup>1</sup>：怎能  
10 會堪著 e<sup>7</sup>kham<sup>1</sup>tsit<sup>4</sup>：受得了  
11 閣再 ko<sup>1</sup>tsai<sup>3</sup>：再  
12 嘛 ma<sup>7</sup>：也  
13 忍袂牢 jim<sup>2</sup>be<sup>7</sup>tiau<sup>5</sup>：忍不住  
14 知也 tsai<sup>1</sup>ia<sup>2</sup>：知道  
15 恐驚 khiong<sup>2</sup>kiann<sup>1</sup>：恐怕  
16 每工 mui<sup>2</sup>kang<sup>1</sup>：每天  
17 倒落 to<sup>2</sup>lo<sup>0</sup>：躺下  
18 時陣 si<sup>5</sup>tsun<sup>7</sup>：時候  
19 會當 e<sup>7</sup>tang<sup>3</sup>：能夠、可以

### 3 白頭毛

當年是赫爾仔倔強佻驕傲  
毋管鉸刀不時剪斷野火來回燒過  
時間一到  
照常是用滿頭的茂盛佻青翠  
恥笑您白費的心機

只是春風這擺恐驚袂閣再來  
愈積愈厚的霜雪  
掩蓋愈來愈薄的枝葉深埋著長眠袂醒的根脈  
就算以後冰凍化解的土地  
應該也是一片寸草不生的沙漠  
隨在伊  
冷風的摳洗艷日的諷刺

- 註：1 赫爾仔 hiah<sup>4</sup>ni<sup>7</sup>a<sup>2</sup>：那麼的  
2 毋管 m<sup>7</sup>kuan<sup>2</sup>：不管  
3 鉸刀 ka<sup>1</sup>to<sup>1</sup>：剪刀  
4 佻 kah<sup>4</sup>：和、與  
5 恥笑 thi<sup>2</sup>tshio<sup>3</sup>：嘲笑  
6 您 in<sup>1</sup>：他們  
7 這擺 tsit<sup>8</sup>pai<sup>2</sup>：這次  
8 恐驚 khiong<sup>2</sup>kiann<sup>1</sup>：恐怕  
9 袂閣 be<sup>7</sup>ko<sup>1</sup>：不再  
10 隨在 sui<sup>5</sup>tsai<sup>7</sup>：隨便、任憑  
11 摳洗 khau<sup>1</sup>se<sup>2</sup>：羞辱

## 4 挽嘴齒

一向  
你是上鐵齒的基本教義者  
也是立場上強硬的主戰派  
堅定固守入門的第一道關口  
任何外來的人物  
若無經過你嚴密的搜查  
根本無法度隨便入來  
所有內心的秘密  
攏愛得著你親身的允准  
才有可能漏洩出去

想袂到  
猶是袂堪著時間的考驗恰美食的引誘  
純白的外表之下竟然潛伏著無數的奸細  
暗中破壞你我親密的關係  
予你的內心漸漸腐敗立場慢慢動搖

爲著避免日後成做痛苦的來源  
只有忍疼提早將你  
挽掉

- 註：1 挽嘴齒 ban<sup>2</sup>tshui<sup>3</sup>khi<sup>2</sup>：拔牙齒  
2 上 siong<sup>7</sup>：最  
3 鐵齒 thih<sup>4</sup>khi<sup>2</sup>：嘴硬  
4 攏愛 long<sup>2</sup>ai<sup>3</sup>：都要  
5 想袂到 sionn<sup>7</sup>be<sup>7</sup>kau<sup>3</sup>：想不到  
6 猶是 ia<sup>2</sup>si<sup>7</sup>：還是  
7 袂堪著 be<sup>7</sup>kham<sup>1</sup>tsit<sup>4</sup>：受不了  
8 恰 kah<sup>4</sup>：和、與  
9 予 hoo<sup>7</sup>：讓、給

## 4 耳孔叫

這是我二人長久以來的秘密  
也是我一直講袂出嘴的苦衷  
你暝日無停咧糾纏  
尤其是更深夜靜的時陣  
特別感受著你的激情  
連我身邊上親近的人攏無發覺你的存在  
就算是上厲害的特務嘛無才調查探出來的真相  
無論是按怎精密的儀器也無法度破解其中的內幕

因為啊  
這幾十冬來  
我已經聽過千千萬萬遍  
到今猶是聽無你到底是咧  
講啥物

- 註：1 耳孔叫：耳鳴  
2 講袂出嘴：說不出口  
3 暝日無停：日夜不停  
4 時陣 si<sup>5</sup>tsun<sup>7</sup>：時候  
5 攏 long<sup>2</sup>：都  
6 嘛 ma<sup>7</sup>：也  
7 無才調：沒能力  
8 按怎 an<sup>3</sup>tsuann<sup>2</sup>：如何  
9 無法度：沒辦法  
10 聽無 thiann<sup>1</sup>bo<sup>5</sup>：聽不懂  
11 講啥物：說什麼

## 5 失眠

失眠

是一隻貪食的野獸也是上恐怖的敵人

入夜就來

拆裂我的美夢嚙食我的快樂

吞落我的精神佻希望只留下

一暝無盡的驚惶佻一具無神的殘骸

每暗

我共家己關佇銅牆鎖入石壁

派出電眼監視佈下鐵窗防守

竟然逃袂過伊公然的追殺

我請遍各地高手用過各種妙方

拜過四方神明求過諸位菩薩

猶原無法度將伊降伏

干焦會當日珠金金

看伊侵門踏戶

糟蹋我的人生凌遲我的性命

註：1 閣 ko<sup>1</sup>：又、再

2 貪食 tham<sup>1</sup>tsiah<sup>8</sup>：貪吃

3 佻 kah<sup>4</sup>：和、與

4 拆裂 thiah<sup>4</sup>lih<sup>8</sup>：撕裂

5 嚙食 kheh<sup>4</sup>tsiah<sup>8</sup>：啃食

6 一暝 tsit<sup>8</sup>me<sup>5</sup>：一夜

7 每暗 mui<sup>2</sup>am<sup>3</sup>：每晚

8 共 ka<sup>7</sup>：把、給

9 家己 ka<sup>1</sup>ti<sup>7</sup>：自己

10 佇 ti<sup>7</sup>：在

11 逃袂過 to<sup>5</sup>be<sup>7</sup>kue<sup>3</sup>：逃不過

12 猶原 iu<sup>5</sup>guan<sup>5</sup>：仍然

13 無法度：沒辦法

14 干焦 kan<sup>1</sup>ta<sup>1</sup>：只有

15 會當 e<sup>7</sup>tang<sup>3</sup>：能夠

16 目珠 bak<sup>8</sup>tsiu<sup>1</sup>：眼睛